

ABRAHAM SACRIFIANT

Abraham.

- [665] Comment ? comment ? se pourroit-il bien faire,
Que Dieu dist l'vn, & puis fist du contraire ?
Est-il trompeur ? si est-ce qu'il a mis
En vray effect ce qu'il m'auoit promis.
Pourroit-il bien maintenant se desdire ?
[670] Si faut-il bein ainsi conclurre & dire,
S'il veut rauoir le fils qu'il m'a donné.
Que dy-ie ? ô Dieu, puis que l'as ordonné,
Il le feray : las, est-il raisonnable
Que moy qui suis pecheur tant miserable,
[675] Vienne à iuger les secrets iugemens
De tes parfaits & tressaincts mandemens ?

Satan.

Mon cas va mal : mon froc, trouuer nous faut
Autre moyen de luy donner assaut.

Abraham.

- Mais il peut estre aussi que i' imagine
[680] Ce qui n'est point : car tant plus i'examine
Ce cas icy, plus ie le trouue estrange.
C'est quelque songe, ou bien quelque faux ange
Qui m'a planté cecy en la ceruelle :
Dieu ne veut point d'offrande si cruelle.
[685] Maudit-il pas Cain n'ayant occis
Qu'Abel son frere ? & i'occiray mon fils !

Satan.

Iamais, iamais.

Abraham.

- Ha, qu'ay-ie cuidé dire ?
Pardonne moy, mon Dieu, & me retire
Du mauuais pas où mon peché me meine.
[690] Deliure moy, Seigneur, de ceste peine.
Tuer le veux moy-mesme de ma main.
Puis qu'il te plaist, ô Dieu, il est certain
Que c'est raison : parquoy ie le feray.

Satan.

Mais si ie puis, ie t'en engarderay.